

## ***Resposta husi Virgílio da Silva Guterres***

1. Saida mak ita boot nia vizaun estratéjiku ba dezenvolvimentu ekonómiku iha Timor-Leste iha tinan lima oin mai bainhira eleitu nudár Prezidente Repúblika? No intervensaun saida de'it mak ita-boot sei halo atu realiza vizaun estratéjiku ida ne'e iha estadu?

*Estratéjia: Investe iha setor 'não-petrolífero' hodi halo ekilibriu ba despeza orsamentu nebe mai hosi fundu petrolíferu. "Palavra de Ordem" agora mak "Save the Money, save the nation!"*

*Intervensaun:*

- a) Komunikaun frekvente ho Governu atu tau prioridade ba setor xave (não-petrolífera) sira hanesan, edukasaun, saúde, agricultura, turizmu, iha planu dezenvolvimentu hodi aloka orsamentu nebe natoon hodi dezenvolve no haforsa setor sira ne'e. Bainhira tau atensaun didi'ak, setor sira ne'e sei fo retornu sósiu-ekonómiku iha médiu no longo prazo.*
- b) Ajusta (sesuaikan) kapasidade mákina Estado nian tuir prioridade dezenvolvimentu nasional. Reduz ministério sira nebe la nesesariu. Se bele ita iha ministério 24 de'it. Eleva sekretaria estadu juventude no desportu (SEJD) ba ministeriu. Ministeriu Agrikultura no Peska fahe ba rua: Agrikultura, Florestas no Meio-Ambiente sai ida. Peska no Rekursus Maritima menisteriu ida.*

2. Oinsá ita boot nia estratéjia atu asegura direitu umanu, partisipasaun no representasaun feto no ema marginalizada seluk iha ita nia demokrasia, iha ita nia rai rasik?

- Kontinua projetu atribuisaun premiu direitos humanos Sergio Vieira de Melo nudar medida politika ida atu encoraja publiku hodi hatene, respeita no promove direitos humanos iha setor hotu-hotu moris nian;*
- Prezidente da Republika tenki promove dialogu ho sociedade sivil, liliu ONG no ajensia sira nebe nia foku atividade relasiona ho luta ba igualdade feto, igualdade jeneru no grupu minoria sira;*
- Nudar Prezidente Republika, há'u sei la fo indultu ba kriminozu boot sira hanesan estuprador/pemerkosa no pedófilu sira.*

3. Daudauk ne'e, maioria Timor-Leste nia povu mane, feto no labarik sira seidauk hetan nutrisaun, edukasaun no saúde ho qualidade

- Sujestaun saida mak Prezidente sei fó ba governu no Primeiru Ministru no Ministru balun kuandu presiza?
  - *Eleva sekretaria estado juventude desportu (SEJD) ba ministério, atu nune'e, juventude bele iha lian (votu) iha prosesu foti desizaun politika konaba dezvoltimentu nasional. Katak juventude nebe konstitui 60% populasaun Timor-Leste ne'e tenki iha voto iha Conselho de Ministros. Bainhira eleva ona ba ministério, sei hetan alokasaun orsamentu nebe suficiente ba dezvoltimentu juventude nian, iha aspektu hotu-hotu, liliu edukasaun formal no vokasional hodi garante tranzisaun kresimentu juvenil (adolescente ba adultu) nebe saudável.*
- Iha ka lae kompeténsia seluk, alende veta no promulga lei ne'ebé aprova iha Parlamentu, liu-liu hodi haree ba asuntu hirak ne'e?
  - *Kompetensia atu nomeia Prokurador/a Geral da República nebe iha kapasidade no aten-barani atu garante independensia justisa nian, no garante tratamento ka aplikasaun lei nebe hanesan ba ema hotu-hotu. Tanba kestaun la'os de'it "ema hotu hanesan iha lei nia oin" maibe mos tenki "aplika lei hanesan ba ema hotu."*
  - *Kompetensia atu nomeia Presidente Supremo Tribunal de Justiça nebe iha kapasidade no aten-barani atu interpreta konstituisaun tuir espiritu no letra, la'os tuir maun-boot ka partidu boot nia hakarak.*
  - *Kompetensia atu hamutuk ho povu luta kontra injustisa sosial sira nebe mosu tanba prosesu implementasaun planu dezvoltimentu: kontra eviksaun, kontra marjinalizasaun, kontra detensaun sidadaun sira nebe manifesta sira nia opiniaun politika.*
- Asaun saida mak efektivu liu Prezidente bele foti hodi hetan solusaun βα problema sira ami temi iha leten ne'e?
  - *Pro-ativu halo komunikasaun politika, forml ka informal, ho governu, parlamentu, justisa no sosiedade sivil hodi hetan entendimentu hanesan konaba estratégia nasional hodi alkansa objetivu Estado nian nebe hakerek ona iha Konstituisaun artigo 6º konaba Objetivos do Estado. (*

4. Tinan hira ikus hafoin 2012 Timor-Leste nia reseita husi mina no gás tun-sa'e ba kondisaun ne'ebé ita labele kontrola. Maske Timor-Leste nia kampu mina Bayu Undan sei remata iha tinan ida ka rua, no kampu Greater Sunrise iha duvida komersiál, setór produtivu sira hanesan agrikultura, indústriá transformadóra sira no turizmu seidak iha kreximentu.

*\* Resposta numeru 1 nian bele vale mos ba pergunta ida ne'e. Há'u reitera de'it 'palavra de ordem': SAVE THE MONEY, SAVE THE NATION!*

- Oinsá Timor-Leste bele muda husi dependénsia esportasaun ba mina, gas, no minerais ba dalan sustentável liu?
  - *Investe iha setor chave sira: Edukasaun, saúde no agricultura. Setor turismo mos tenki hetan prioridade maka'as iha desenvolvimentu. Edukasaun tenki ho objetivu atu forma ema nebe iha kapasidade atu halo auto-emprego, katak bele fo servisu ba nia na rasik no loke kampu trabalho ba ema seluk.*
- Polítika ka sujestaun saida mak Ita-Boot sei kontribui atu hasa'e ekonomia Timor-Leste no sustenta finansas estadu bainhira mina-rai sei maran?

*Hamenus makina Estado nian. Ministeriu maximu 24 de'it. Halo moratorium ba sosa kareta ba deputado/a sira. Estado fo ona subvensaun publika ba partidu politiku sira nebe hetan asentu iha PN. Partidu politiku tenki utiliza subvensaun publika ne'e hodi garante facilidade (transporte no komunikasaun) ba sira nia kuadru sira nebe tuur nudar deputadu/a iha PN. Halo revizaun ba lei pensaun vitalisia hodi fo limite ba eis-titular sira nebe merese duni atu hetan.*

5. Dékada rua Timor oan restaura nian independénsia, felismente ita laiha tan funu, tratamentu kruél no desaparecimento forsadu. Esforsu saida mak ita-boot bele kontribui hodi ajuda hakotu impunidade ba krime grave durante okupasaun Indonézia nian? No iha Relatóriu Chega! rekomenda atu comunidade internasionál liu-liu Nasaun sira no kompañia sira inklui atór sira presiza fó reparasaun ba estragu ne'ebé iha durante funu. Ita-boot sei halo esforsu ruma atu asegura diretu ida ne'e ba sobrevivénte sira?

*a) Enkoraja orgaun soberanu, instituisaun Estadu no sociedade sivil atu implementa tuir ida-idak nia papel no responsabilidade rekomendasaun sira nebe hakerek iha Relatoriu Chega! No Per Memoriam ad Spem, liliu apela ba ema hotu atu hapara diskriminasaun bazeia konviksaun politika pasadu nian. Halakon stereotipo politika "pro-otonomi, pro integrasi" ka "APODETI traidor, UDT fa'an rai."*

*b) Promove dialogu bebeik ho komponente sosiedade hotu-hotu, inklui partidu politiku sira 1974 nian hodi buka solusaun oinsa esklareses estatuto timoroan sira nebe mate iha periudu funu maun-alin (1974-1975), liliu dirijente no elementu partidu APODETI no UDT sira nebe mate iha Aileu no Manufahi iha 1975.*

*c) Koalia ho Xefe Governu atu encoraja ministério relevante (MNEC) kontinua ejiji responsabilidade moral, sosial no politika ba Povo Timor-Leste tuir rekomendasaun Chega! no Per Memoriam ad Spem.*

6. Liga ba Artigu 87. (Kompeténsia kona-ba relasaun internasionál) daudauk ne'e funu entre Rúsia no Ukránia, iha semana rua liu ba Rúsia halo invazaun kontra Ukránia. Husi atake ida ne'e, rezulta ona ema barak mate, estraga infrastrutura barak iha territóriu Ukránia nian no ema liu tokon ida ho balun (1,500,000) mak hasai sai ona husi Ukránia. Nudár Prezidente Repúblika, saida mak ita boot sei halo hodi kontribui pás iha mundu, no aseguara relasaun di'ak entre nasaun hotu?

*a) Ita nia Konstituisaun fo dalan atu ita solidariu ho povu rai-seluk nebe luta ba ninia auto-determinasaun ka sira nebe presiza tulun humanitariu ruma. Nudar nasaun kiik, ita tenki utiliza dalan hotu-hotu atu bele haboot ita nia naran iha mundu, liu-hosi intervensaun politika, sosial no humanitária nebe ita halo. Estado tenki fo apoiu suficiente ba ita nia Cruz Vermelha Timor-Leste atu bele iha kapasidade atu halo intervensaun humanitária iha mundu, liu-liu iha rejiaun azia no pasifiku ne'e. Estado mos tenki investe maka'as iha RTTL no Tatoli atu bele sai RDTL nia lian ba mundu rai-klaran. La'os halo instituisaun 2 ne'e sai de'it porta voz ba governu, maun-boot sira ka partidu boot sira.*

*b) Apoiu nebe Estado RDTL fo ba rai seluk tenki ho objetivu atu hamorin nia naran iha mundu. Apoiu sira ne'e labele hatudu fali ita nia "hipocrisia/kemunafikan" iha mundu internacional, liliu iha ita nia povu nia oin. Ita labele ajuda Ukraina, maibe taka-matan ba Myanmar. Ita labele fo apoiu ba polisia iha nasaun CPLP sira, maibe hosik ita nia PNTL moris iha kondisaun miserável.*

7. Tinan hirak ikus ne'e, Governu koko introdús lei krime sibernetika no kriminaliza defamasaun, ida ne'e iha poténsia ba limite liberdade imprensa no espresaun, ita-boot sei iha esforsu ruma atu aseguara liberdade ema nian ba espresa no imprensa, inklui iha media sosiál? Oinsá ita boot bele enkoraja Timor-oan sira hotu atu rona ba malu?

*Nudar Prezidente Republika há'u sei la promulga lei sa ida de'it mak buka limita liberdade imprensa no liberdade expresaun. Há'u sei komunika no enkoraja governu no parlamentu labele produz lei ka kuadru legal sira nebe contradiz ho artigo sira iha ita nia Konstituisaun, liliu artigu 9º. konaba 'Recepção do direito internacional' no artigo 23º. konaba 'Interpretação dos direitos fundamentais.'*

*Atu halo timoroan rona-malu, Prezidente tenki hatudu ezemplu oinsa atu rona ema seluk. Prezidente tenki rona governu, parlamentu, justisa no sosiedade sivil nia hanoin. Prezidente la'os atu obriga ka impoin de'it nia hanoin ba ema ka orgaun Estado seluk hanesan iha tinan 20 ne'e nia laran.*

*Prezidente tenki koalia bebeik ho nia povu, liuhosi vizita ba munisipiu ka liuhosi mensagem ba nasaun.*

*Prezidente tenki encoraja ema atu moris tuir kultura Estado de Direito Democratico. Katak sidadaun hotu-hotu tenki hakruuk ba lei, la'os hakruuk ba Komandante ka Comando Superior de Luta. Iha Estado de Direito Democratico, Presidente da Republica mak Comandante Supremo das Forças Armadas, la iha tan Komandante Supremu seluk-seluk.*

Naran Kandidatura: Virgílio da Silva Guterres

Data: \_\_\_\_\_ Asinatura: \_\_\_\_\_